



續表忠記卷之二

漸岸恒夫趙吉士纂編

四明公弼盧

宜彙輯

熊襄愍公傳

成○天○下○之○大○功○者○負○天○下○之○大○才○者○也○然○負○才○而○遂○  
謂○胥○天○下○之○才○皆○莫○我○若○則○人○必○競○妒○其○才○一○蹶○而○  
身○名○俱○喪○於○國○家○又○何○賴○焉○讀○編○年○而○深○為○熊○襄○愍○  
廷○弼○惜○之○廷○弼○號○芝○岡○江○夏○人○軀○長○七○尺○餘○望○之○嶽○  
立○音○吐○鐘○動○目○若○電○光○閃○閃○少○髯○多○膂○力○十○指○如○懸○



樾能左右射年二十九領省試第一成進士初理保定入爲御史承勘寬莫新疆劾巡撫趙某棄地內徙罪旣而巡按遼東事竣視南京學政執法嚴士子就試雖盛夏若負霜雪又持身廉屏遠膏膩一時名冠西臺然稜稜露崖岸不屑與人申欵曲巡撫荆養喬交相訐解組歸先是廷弼按遼時條上機宜請覈地界飭營伍急撫北關爲外衛人莫之信甫十年萬曆已未杜松等三路敗衄撫順清河陷沒驗若左券上思其言召廷弼仍以御史渡遼安慰軍民隨超擢巡

撫兼兵部侍郎代楊鎬經畧持尚方以便宜從事當是時承平久畏言金革大帥惟知冒糧虛伍攫金錢奉朝貴一旦變起倉卒鋒刃未接已膽落宵奔幕府功罪混淆人無固志廷弼出關至十三站而鐵嶺失瀋陽逃單騎疾馳入遼陽誓師卽斬逃將劉遇節以殉建壇躬祭死綏將士麾下擡眉聳聽壁壘旌旗一時改色修築頽屯廢堡爲堅守計嚴飭兵丁不得私渡三岔河逃者始定常布衣小帽雜卒伍中遠出偵探不專寄耳目於間諜遠近望風畏之乃進理虎皮

驛又進理瀋陽移兵守之乘九月深雪瀋陽合操遂  
赴撫順鼓吹直前一路四顧無人烟撫順城中惟存  
關廟馬神廟廷弼大哭隨行軍士皆哭耀兵分隊返  
駐奉集相度形勢擬移撫順於代子河南據河爲險  
先經理奉集以衛遼陽再議恢復開鐵日夜造車營  
開窖燒磚令每兵採木一株四兵合備一鑪一鍋以  
聽後令蓋將以間築撫順城也○會萬曆泰昌相繼賓  
天天啓卽位方幼冲廷弼與中朝議多不合上遣給  
事中姚宗文閩邊姚故同列臺省一旦膺特簡稱閩

科持內府體統廷弼心易之甫開燕幕吏傳有外警  
廷弼介而馳命屬吏欵姚姚色動未幾廷弼還笑曰  
老掌科毋恐此邊關常事耳燕罷姚偵得外實無警  
意廷弼戲之恨甚又議以四千金西借兵力金入兵  
不出廷弼復貽書諷之凡翰札相遺故置之不甚裁  
答總視爲書生不諳大計彌相失臺省李希孔毛士  
龍方震孺疏攻宗文魏應嘉馮三元張修德疏攻廷  
弼舉朝譁於五都之市徒以左右袒互相詬誶於遼  
事茫無濟也廷弼亦引疾乞休命袁應泰代之計廷

彌○在○遼○不○及○兩○年○而○東○障○無○虞○西○堠○無○烟○遼○左○之○頽○  
城○如○新○喪○膽○之○人○心○復○定○奉○集○瀋○陽○二○空○城○儼○然○重○  
鎮○不○可○謂○非○廷○弼○之○有○造○於○遼○也○廷○弼○去○遼○時○疏○言○  
廟○堂○不○知○軍○情○第○憑○塘○報○緩○輒○闕○言○師○老○馬○上○催○戰○  
及○敗○又○愀○然○噤○口○不○敢○言○戰○字○比○見○收○拾○纔○定○而○愀○  
然○者○又○復○責○戰○矣○言○雖○戇○實○切○中○時○弊○第○自○視○過○高○  
才○情○氣○魄○推○倒○一○世○鄙○薄○朝○紳○皆○齷○齪○不○足○掛○齒○眼○  
對○大○吏○叱○咤○風○生○兩○司○白○事○不○敢○平○面○視○土○芥○將○帥○  
動○輒○施○鞭○扑○持○三○尺○不○少○假○凡○有○興○作○刻○期○鳩○工○紳○

袍○子○衿○役○無○一○免○嚴○逐○遊○客○不○令○遷○延○地○方○稍○容○關○  
說○而○勝○心○過○激○所○向○護○前○雖○府○怨○招○尤○而○不○恤○勘○科○  
朱○童○蒙○言○官○吏○軍○民○遮○道○代○訴○數○萬○生○靈○皆○舊○經○畧○  
所○留○而○功○在○存○遼○罪○在○任○性○亦○定○評○也○廷○弼○謝○罪○僅○  
五○月○而○瀋○陽○陷○遼○東○破○經○按○諸○臣○俱○死○廟○堂○追○咎○去○  
廷○弼○之○失○益○思○其○言○乃○降○馮○三○元○等○而○削○姚○宗○文○籍○  
仍○授○經○畧○專○守○山○海○關○敦○趣○就○道○輔○臣○劉○一○璟○主○議○  
也○廷○弼○聞○命○卽○起○仍○賜○尚○方○假○便○宜○令○九○卿○祖○餞○都○  
門○外○以○寵○其○行○本○兵○張○鶴○鳴○復○設○餞○三○十○里○外○與○有○

所私廷弼岸然曰今日且不必言邊事鶴鳴由此恨之逆奄新竊魁柄殺太監王安廷弼蔑視之無加禮而廷臣與廷弼角者皆隸奄門下日夜媒孽其短特以封疆任重倚毗方專毋敢頌言攻之然皆眈眈視也本兵張鶴鳴撫黔定亂負盛名自許知兵又以前郊餞故與廷弼不相下王化貞新任遼撫氣甚銳化貞兵十三萬治廣寧近而逼廷弼以五千人守右屯去廣寧差遠化貞大言必能靖邊廷弼堅謂廣寧必失河西必危其乞留臣言以券一疏允爲先見然朝

論向化貞者蓋意其或可成功而恨廷弼之侮人過甚也廷弼亦素自詡以爲舍我無可獨當一面者聞化貞遽以此自任意不平復以爭毛文龍功罪互詆之章日上廷弼意在慎重主畫關以守而不欲戰化貞意在過河主戰而不欲守且欲用西人又輕信內間廷弼屢貽書言之化貞終不省本兵張鶴鳴亦主化貞議而撫樞與經畧如水火鶴鳴自請行邊亦欲調劑經撫而經撫終不和廣寧遂陷初化貞於辛酉十月進師所恃惟西兵旣以重資購之壬戌正月二

十一日沙嶺一戰陣方交西兵先遁師大潰

大兵尚未至鎮武廣寧聞之化貞帳下督有爲內間者疾呼於道曰兵敗矣百姓爭奪城門走部將江朝棟急入化貞卧內告變化貞方視案牘茫然未知聞朝棟言趨出廐中馬已被盜去倉皇覓騎奔至閭陽驛廷弼自右屯至化貞向之大哭廷弼笑噍化貞曰六萬軍蕩平遼陽今竟何如化貞慙議守寧前廷弼曰晚矣此時氷解之勢誰與爲守惟護難民入關勿使失所足矣廷弼意化貞之敗可以自驗其言且已

在關內王在廣寧勅書專令守關關以外非其專轄真可倖免不知經撫之責功罪一體廣寧雖失寧遠尚可守也委而去之烏得無罪哉言者並以私逃論奉旨化貞逮問革廷弼職聽勘廷弼亦自詣法司識者平心論之廷弼再任經畧不取一錢不通一餽連章屢揭終日焦唇敝舌與人爭國事如家事且逆奄盜弄威福士大夫拔墮鬚眉一望茅靡設令稍事委蛇卽可生出獄門而終不改其強直之性以致獨嬰顯戮乃化貞棄地宵奔反得延晷福堂甚有以其名

入薦牘者此忠臣義士所以拊心而泣血也法司會  
審時上命問廷弼廣寧可復否曰可復則不失又問  
何以不可復曰以平章如是之主張以樞部如是之  
調遣以經撫如是之籌畫以臺省如是之議論而謂  
廣寧可復乎不可復乎此言上聞而一時廷臣爭欲  
殺廷弼不可挽矣與化貞俱坐大辟在獄四年會楊  
漣劾奄二十四罪黨人疑出廷弼手有蔣應暘者故  
廷弼部下將及下獄代爲投揭白寃時入監左右之  
攜有遼東圖畫爲厥衛所緝獲坐妖言棄市牽涉廷

弼五年八月四鼓中貴捧駕帖至廷弼洗沐整冠登  
堂曰我大臣也死當拜旨提牢主事張某見胸前懸  
謝恩表曰爾不曾讀李斯傳乎囚安得上書廷弼曰  
此趙高言也盛世安得有此遂死西市傳首九邊絕  
命詞云可惜復可惜報國寸心赤幾度事戎行九死  
衽金革雖無衛霍奇三驅遁聲跡掃蕩直需時竚銘  
瀚海石人事一朝變頓成芻狗脊繫獨余數奇實惟  
國家厄蒼蒼天蓋高微誠何由格萬憤結中懷塞兌  
坐焚炙我心已死灰我骨已枯腊我燐騰火青我血



化水碧月冷烏啞啞橋危樹撼撼孤魂依故骸羣蠅  
作弔客嶽嶽高岡松矯矯秋旻翮目炯掣電熒氣轟  
巨靈擘衝口倒峽流信手奏刀砉左握靈虵珠右搦  
雄狐戟顛倒羣策奔叱咤千夫辟只今赤白囊晝夜  
飛羽檄婦人冠赤幘將軍服巾幘援枹思鷹揚舍我  
其誰適試叩囊底餘猶令風飈息云何剪敵忌甘心  
快毒螫長城萬里壞將星中墮罌他日倘鼓鞞安得  
起死魄絕筆歎可惜一歎天地白行刑時挺立不跪  
強項如故廷弼死而遼瀋廣寧竟不可復識者咸惜

廷○弼○才○不○竟○其○用○亦○不○自○善○其○用○坐○爲○樞○撫○所○掣○肘○  
身○死○名○僨○悲○夫○長○子○兆○珪○束○身○砥○行○有○聲○庠○序○間○見○  
其○父○與○朝○貴○牴○牾○每○乘○間○泣○諫○不○從○及○坐○賊○十○七○萬○  
勒○限○嚴○追○久○繫○囹○圜○中○出○而○告○貸○莫○措○迫○而○自○刎○崇○禎○  
改○元○乃○免○遺○骸○尚○未○收○次○子○兆○璧○詣○闕○泣○請○御○史○饒○  
京○以○爲○言○不○許○輔○臣○韓○爌○力○頌○其○寃○乃○准○歸○葬○南○渡○  
贈○官○追○諡○襄○愍○自○後○廟○堂○每○追○思○廷○弼○而○化○貞○至○崇○  
禎○四○年○亦○死○西○市○

林時對曰公以遼東傳刊書惑衆借此先罹重辟  
聞傳乃僞撰者閣臣袖以進呈附會成獄未幾貴

池輿行長安道白日見公歸寓腦裂死本兵卸罪於公得歸故里流賊破穎身首俱碎亦天道也崇禎時輔臣韓爌錢龍錫揭請葬公有不死於封疆而死於門戶語公道始明焉  
明名臣言行錄曰宋室不競欲殺岳武穆剪敵忌而壞長城者獨一秦檜耳今舉朝皆檜欲求公之不死遼事之克振其可得乎讀經畧奏牘未嘗不服其才悲其遇而恨小人之誤國也噫  
趙吉士曰公生平敢於任事議論經濟皆卓卓可見諸施行固一代偉人也封疆一案罪在不守寧前與王撫聯騎入關耳然而公罪究薄於王也使三方之進退盡屬指揮經撫同心以紓國難戰或不足而守可無虞奈何袒撫抑經而謠詠紛如終債國事諺曰狐埋之而狐搯之則廟堂之操政本者不得辭其責矣若其死於圖讖與死於遼東傳總皆死於黨人也悲夫

### 葉文忠公傳

老○臣○歷○相○三○朝○始○則○調○護○東○宮○後○復○維○持○奄○難○者○今○猶○追○頌○福○清○云○福○清○者○臺○山○葉○向○高○也○幼○稱○奇○童○就○縣○試○許○令○夢○熊○大○奇○之○聞○邑○有○俞○氏○女○未○婚○召○俞○令○婿○向○高○卽○在○公○堂○拜○花○燭○如○徐○華○亭○受○知○於○提○學○御○史○聶○豹○事○萬○曆○癸○未○成○進○士○入○詞○林○歷○中○允○泰○昌○在○東○宮○出○閣○向○高○主○對○句○寫○倣○指○次○明○切○喜○語○近○侍○曰○此○飛○鬚○先○生○也○向○高○鬚○長○恒○被○風○披○拂○故○云○當○是○時○四○明○柄○國○不○協○於○江○夏○妖○言○起○向○高○爲○南○少○宰○貽○書

規諷四明大忤其意以此在南不調者十二年品望益重四明歸乃入閣萬曆久不視朝宮中共晨夕者惟鄭貴妃與左右大璫數人羣臣章奏槩不批發京朝官缺者槩不點補大僚乞休者竟出國門不復候旨而監視四遣民怨沸騰甚且騷擾激變四方紛起向高隨事具密揭以進上或從或否外廷或聞或不聞亦惟匪躬自靖而已繼而朝政日頽東宮不講學枚卜不行起廢考選諸邊兵餉吏部察典兵部軍政皆置寢擱內閣朱賡卒李廷機去惟向高一入調旨

部院大臣現在供職者不過三數人科道初亦上疏請之請之不得咸歸咎於向高以爲焉用彼相非不知其心力費盡無可如何第指謫交加庶幾上聞或得所請而上終付之不問屢疏乞休又不聽其去向高之地益難而心益苦矣臺省又遺書責向高不能率九卿伏闕向高曰伏闕事我朝凡兩見未嘗一聽皆杖死數十人大損主德況正嘉間止爭一事今之事多矣將何所指乎毋論上不聽也卽幸而聽一二事矣其他之不聽者又將伏闕乎久之則亦爲故事

矣。宜該部連疏苦請而躬於文華門候旨。衆咸服之。黔國庄丁收租橫索向高奏歸之。有司民乃得安。西  
北東林浙閩之爭調停必執於正。癸丑典會試特命  
卽闈中票旨且增額示眷向高感恩深重於東朝。調  
護尤力。皇太子生母貴妃王氏薨向高力持喪葬咸  
得盡禮。鄭貴妃寵旣專夕而母愛子抱上意獨眷福  
王幾啓奪嫡之嫌矣。羣臣屢請之國日期屢易而未  
有行意向高婉轉調停得旨造福王府第人心乃安。  
妄男子王曰乾效妖書故轍撼及宮闈謂呪詛皇太

子語多涉貴妃。通政司叅疏上向高隨具揭付內臣  
告之故。且日上問方進上果覽疏震怒莫知所處。掀  
翻御案左右辟易曰此大事閣臣何以無言。璫應聲  
以揭進大約謂小人奸計當靜以處之母爲所動上  
覽之威頓霽。緘疏不問皇太子取揭稿對以皇上旣  
置不問殿下亦毋庸更覽太子深是之。向高遂揭言  
東宮輟講八年福王之國無期致啓羣疑實難家喻  
上又以聖母稀齡爲辭向高請上豫慶卽遣王行所  
撥土田四萬頃向高疏減其一又請王自辭其一漸

有次第次年二月聖母崩撰遺詔明著婚封定期并  
釋楚宗又蠲稅額之半中外懽呼一日貴妃遣人來  
言曰先生全力爲東朝願分少許惠顧福王向高正  
色曰此正老臣全力爲王處人稱萬歲千歲及吾輩  
云百歲者徒虛語耳皇上壽登五十不爲不高起此  
寵眷時啓行資贈倍厚宮中如山之積惟意所欲若  
時移勢改常額外絲毫難得況積年口語可畏王一  
之國百口冰解更得賢聲老臣爲王何所不至耶貴  
妃心動乃如期行先是禮部定儀注王之國別皇太

子四拜坐受無他語向高密啓皇太子必當加意太  
子深然之欲下座答拜福王固辭乃立受答其二握  
手泣別送至宮門福王過望帝與貴妃皆大喜太后  
山陵題主例應次輔上特遣向高亦異數也襄事畢  
遂請省葬不允固請乃加少師坐蟒馳驛又令留數  
日毋卽行向高疏勸舉政用人并薦名臣鄒元標等  
有旨褒答且遣內臣齋藏經賜其邑黃蘗寺并圖其  
山川以歸張差事起上歎曰葉閣老在事不至此泰  
昌卽位命召向高天啓復趣之入時南昌在閣與老

璫王安同心輔政向高入南昌遜之居首揆朝政一新未幾王安見殺南昌以言去國逆奄勢益橫以向高者碩未敢失禮向高亦曲加調護朝士倚之文震孟以言事忤璫欲杖之向高力爭謂此乃今上首科狀元且文丞相孫也奈何得罪神明蓋燕俗敬事信國遂得解他如救章允儒帥衆周宗建之廷杖高攀龍劉宗周之重處向高力居多嘗曰昔年事神廟以手代口所請多允今日與內臣執辯以口代手所處益難閣中一片地幾成口舌場矣後卒如向高言歛

人汪文言者故王安客出入向高門下亦與楊左諸君子往來羣小借以傾諸君子而向高亦不安其位矣當副憲楊漣劾奄二十四罪時九卿科道疏連上與向高爲助應曰閣臣與廷臣所處不同廷臣主發奸不憤激則不盡情閣臣主平章若附和反致僨事因具密揭言忠賢之勤勞朝廷寵眷已隆盛滿難居宜聽歸私第善全終始楊漣一人之言容有過激未幾而諸疏繼至矣又未幾而臺省九卿復有公疏矣留都各衙門公疏疊至矣舉朝閔然卽臣等亦被其

指○摘○甚○者○疑○為○忠○賢○畫○策○當○與○焦○芳○同○傳○矣○揭○上○大○  
與○奄○忤○又○言○內○操○一○事○祖○宗○朝○所○無○聚○數○萬○甲○兵○於○  
肘○腋○間○今○時○雖○無○可○慮○他○日○終○成○隱○憂○止○之○便○益○拂○  
奄○意○已○而○向○高○甥○御○史○林○汝○翥○以○畏○廷○杖○潛○遁○羣○奄○  
圍○向○高○第○大○索○向○高○疏○言○中○官○圍○閣○臣○私○宅○搜○索○朝○  
官○二○百○餘○年○來○所○無○臣○若○不○去○何○顏○見○士○大○夫○奉○旨○  
慰○留○向○高○決○意○引○退○恩○禮○有○加○嗣○後○南○昌○蒲○州○皆○遭○  
削○奪○向○高○歸○二○年○甲○子○卒○於○家○贈○卹○獨○優○向○高○初○去○  
國○疏○至○六○十○二○再○去○疏○至○六○十○七○始○放○行○蓋○前○所○處○

者○在○骨○肉○之○間○後○所○處○者○在○豎○嫗○之○際○其○艱○難○倍○於○  
尋○常○萬○萬○讀○向○高○傳○而○論○其○世○亦○可○以○諒○其○心○矣○

趙吉士曰公之相業善於因事就功此正學問經  
濟大過人處豈小儒淺見者所得而測其涯涘哉  
易曰樽酒簋二用缶納約自牖其公之謂歟  
盧宜曰公在綸扉多所補救而請止廷杖功尤不  
淺此皆公之妙用也廷杖與東西廠錦衣衛皆前  
代所未有而殺人甚慘舉大小百官之命反懸於  
二三旗校之手此外又有囊頭之辱以宣廟之明  
主而獨創此刑枷御史屢愷等三人雖曰此三人  
者沉湎酒色久不朝參故與眾懲之然此例一開  
迨正統而辱及尚書侍郎以祭酒李時勉之剛方  
正直抗顏為胄子師而恣中官王振之威福尤為  
可歎其後死於廷杖者更不可數計故事凡杖者  
以繩縛兩腕囚服逮赴午門外每入一門門扉隨  
闔至杖所列校百人執棍立兩旁司禮宣駕帖訖

坐午門西墀下之左錦衣衛使坐於右其下趨走者皆服緋須臾縛受杖者定左右厲聲喝擱棍則一人持棍出擱於應杖者股上喝打卽行杖杖至三則喝令著實打或伺上意不測喝令用心打則必無生理矣五杖則易一人喝如前每喝環列者羣和之喊聲動地聞者股慄凡杖承以布四人昇之杖畢舉布擲諸地幾絕者十恒八九世宗朝刑部尚書林俊遺表切諫畧曰臣見成化時廷杖三五人皆容其厚綿底衣裹以重氈疊帕猶卧褥數月淤血方消正德時逆瑾始令去衣以諫止南巡杖舒芬黃鞏等一百三十人死者陸宸等十一人嘉靖三年羣臣爭大禮聚哭左順門杖豐熙等一百三十四人死者王思等十七人此其最酷者矣神宗時爭首輔張居正奪情杖翰林趙用賢吳中行主事艾穆沈思孝鄒元標五人天下冤之其後神宗益厭言者疏多留中廷杖浸不用至天啓四年太監王體乾奉勅大審復開其端杖戚畹李承恩以媚忠賢又杖斃主事萬璟御史吳裕中以威

脅廷臣公特疏言以數十年不行之敝政而三見於旬日之間萬璟已亡林汝燾汪文言亦將就斃廷杖之事萬萬不可再行以全好生之德其後雖殞諸君子於詔獄不復廷杖則皆公疏之杜其機芽也又曰聞廷杖者杖畢負而出亟剗去腐肉割黑羊股肉以補之肉雖聯合而羊毛終不落天陰則刺痛宜里中楊文懿公守陳曾受杖亦用此法而行杖時視受杖者之足如箕張則可生如靴尖一斂不可救矣



劉文端公傳

有明萬曆庚申歲一月三朝宮闈事變叵測其扶危  
定傾奠宗社而翼幼主者在閣臣中首推劉文端一  
燦云一燦號是菴南昌人父曰材官布政見一焜官  
巡撫一燦與仲兄一煜同舉進士門第高華號爲三  
劉一燦嚴氣正性樂善持公丁巳京察有欲中繆宮  
允昌期者一燦方爲翰林掌院力持得免泰昌卽位  
召福清於家而進一燦宗伯入東閣與蒲州並命一  
時慶綸屏得人不及一月上不豫一燦受顧命次日

晏駕羣臣進將哭臨爲守門內侍所阻楊給事漣厲  
聲叱之乃入舉哀畢一燦卽問皇長子安在太監王  
安曰李選侍匿禁煖閣中要封皇貴妃一燦大言誰  
敢匿新天子者安曰徐之公等慎勿退趨而入上見  
安呼曰伴伴來救我安軟語選侍皇長子不出諸大  
臣不肯退第一出見羣臣卽還選侍初領之旣而悔  
攬上裾不釋手安直前擁抱皇太子趨而出英國公  
張維賢捧右手一燦捧左手升寶座呼萬歲事乃定  
選侍猶趣呼皇長子還閣一燦不可請暫居慈寧上

喜顧語安曰伴伴今日安往得髯閣下伴我乃無恐  
一燦髯修故云翌日周冢宰嘉謨楊給事漣左御史  
光斗疏請選侍移宮首輔方從哲議展期一燦不可  
曰有先朝故事在今處慈寧暫耳新天子不居乾清  
將誰居選侍卽日移熾鸞宮上乃入居乾清而移宮  
之謫起矣當是時首輔以人言去福清召未至一燦  
內與老璫王安外與同列韓爌同心輔政收召名賢  
人以爲太平可致而釁孽漸萌有不得竟行其志者  
內侍李進忠田詔等盜內庫金寶上傳饒死羣奄疏

辨一燦引例執奏封還原本而內侍恨逆奄援陵工  
遂敘一燦引祖制抑之又與福清救言官之劾逆賢  
攻客氏者而客魏恨謂遼事鑿空東江不足恃西援  
未可信議棄廣寧者三尺不可貸而島帥寧撫與逃  
將恨遼瀋失陷一燦念前經畧熊廷弼固守經年臺  
省交章構陷坐撤長城遂於經筵面奏廟堂提掇中  
外精神全在用舍賞罰各得其當不慮邊臣不用命  
疆宇不寧謚因擬諭令查究論劾廷弼諸姓名法司  
治罪得旨處分仍起廷弼爲經畧人心大快而言路

之側目護黨者交恨於是合謀逐一燦先造蜚語謂  
一燦不欲福清入政府給事某疏殺王安隨即例轉  
其黨指一燦爲王安報仇而謀翻移宮者復詆譎萬  
端一燦去志遂決抗疏至十二上乃得請陞辭疏勸  
皇上延見儒臣留心經史復爲王安熊廷弼聲冤累  
累數百言痛切明快直道大昭逆奄與攻廷弼者恨  
益深一燦去後身受削奪而大獄煩興衣冠塗炭祖  
宗二百餘年培養之元氣銷磨殆盡士運厄而國運  
隨之然後痛恨於羣小之貽禍也亦已晚矣削奪後

風波時起常從容語所親曰吾孤生餘年命如懸絲  
仰賴九廟神靈與一腔心血耳彼以三案殺我則與  
應山同日以封疆殺我則與經畧同科持忠入地復  
何所憾讀書樂道危坐竟日坦然若無所與者崇禎  
登極詔復官階遣行人存問至九年乃卒訃聞輟朝  
優贈諡文端

趙吉士曰公進則以道事君退則樂天知命身履  
端揆而屋廬如故僮僕數人門庭如寒素蓋有學  
問行乎其間而非功名之士可同日語也黃宮詹  
道周詩曰二十年來塵土裏無人更說南昌劉鳴  
呼所感深矣

### 大學士韓公傳

附姪孫歷城知縣承宣昭宣

明泰昌朝顧命大臣以忠清正直著者推南昌與蒲  
州皆爲逆奄所摧抑。蒲州後雖再起亦不竟其用而  
去。復死於闖賊之難。云蒲州者韓爌號象雲由進士  
入翰林歷官至禮部侍郎泰昌登極進宗伯拜東閣  
未幾上不豫首輔方從哲奏進李可灼紅丸次早上  
崩諸臣方咎用藥之悞從哲請賞可灼銀五十兩於  
是指摘交加禮臣孫慎行疏引許世子以責從哲比  
於弑君盈廷大闕爌獨言國家有大體以光皇聖明。

而目之曰弑筆之於史何以示後且諸臣借受顧命不能奏止均之罪也安得獨坐首輔請諭告中外使議法者勿以小疑成大疑編年者勿以信史爲謗史則先帝高朗之令名與皇上光揚之大孝正終正始永世有辭爨疏出而戍可灼以成獄從哲得以善去卽慎行等亦不以異議爲嫌也福清召至爨與南昌三人同在政府天下引領望治而逆奄與客氏漸竊朝柄導上佚遊副憲楊漣二十四罪之疏上僉憲左光斗吏科都魏大中繼之司寇王紀臺省周宗建李

應昇黃尊素等章滿公車南京部院大臣陳道亨等國學祭酒蔡毅中等公疏抨彈天啓皆置之不問爨屢進揭帖亦抑而不省福清知勢不可回先乞休去爨與南昌竭力支撐奄勢益橫朝政益非冢宰總憲皆跟踉去位爨力言一日而去兩大臣軍民失望且御批竟發不復到閣而高攀龍一疏經臣票擬又蒙御筆改移大駭觀聽旨復切責爨乃上疏自劾略曰臣以謏劣承乏中書詰戎宜先營衛而觀兵肘腋無能抒宵旰之憂忠直尚稽召還而撈掠朝堂無能挽

雷霆之怒。以至先後多官之黜。諭旨中出之變。在聖明祇肅紀綱。乃中外懼與黨禍。既不能先時深念。有調劑之方。又不能臨事挺持。爲封還之戇。亟請褫官治罪。旨又切責。予告去封疆。獄起摘爨。票擬輕庇。矯旨削籍。坐贓二千兩。家人韓三拷死。獄中爨悉變田宅。以償。因棲息先墓。勢方岌岌。天啓崩。得解。崇禎立。召爨復相。逆黨力爲阻執。不聽。既陞。見慰勞。甚至旋取禁中。凡羣臣媚逆章奏。槩行發爨。以六等治罪。案成。疏言彼重處者。知媚逆之不可爲。卽寬政尚從褫。

削此量懲者。幸身名之未盡辱。縱槁項亦屬恩波。頒行天下。咸服其公。一日上以汰兵裁驛二議。問爨言。汰兵當清占冒。及增設浮兵。若衝地舊額。固不可汰。驛遞疲累。當責按臣核減。以蘇民困。其所節省者。當卽蠲之本處地方。以示德意。上深是之。經略旣刑遺骸。尚未收次子兆璧。泣請爨力以爲言。上感動。乃許收葬。時廷臣齟齬東林者。爭撼逆案。冀援引一二人。以漸更置。爨堅持之。羣小耽耽力請致仕。乃賜銀幣。命行人馳驛送歸。十七年闖賊渡河入晉。破平陽。陷

蒲州時燬已病亟繫其幼子以肩輿昇燬去受驚而  
殂子得放還燬姪孫承宣中崇禎甲戌進士爲濟南  
歷城知縣戊寅冬城破正衣冠自縊殉節而死承宣  
弟昭宣最勇健由燬廕官至青州兵備道甲申四月  
大兵定燕京棄官歸戊子起兵戰歿於陣

文秉先撥誌曰韓三之獄奄黨欲牽陷蒲州崔呈  
秀等復從中主之王體乾李永貞等先宣言世廟  
時夏文愍故事逆賢已有成心幸韓三至死不肯  
妄承雖追賊而得免奇禍云  
盧宜曰野乘贊公家居幾二十年無求田問舍之  
事無梯山駕壑之舉無煦嘔骹骹之態無崖岸巖  
絕之容擬之古人殆李文靖一流而所遇又不同  
矣

### 楊忠烈公傳

附郎中蘇繼歐

有明三百年相○臣○前○有○三○楊○曰○楊○榮○楊○溥○楊○士○奇○最○  
後○楊○一○清○能○寘○逆○奄○劉○瑾○於○死○爲○尤○著○諫○臣○亦○有○三○  
楊○曰○楊○爵○楊○最○楊○繼○盛○最○後○楊○漣○首○攻○逆○奄○魏○忠○賢○  
以○死○爲○尤○烈○而○一○代○盛○衰○之○概○約○略○可○見○矣○漣○字○文○  
孺○號○大○洪○湖○廣○應○山○人○萬○曆○丁○未○進○士○初○令○常○熟○劇○  
甚○政○廉○明○豪○猾○懾○服○縣○大○治○俸○薄○不○足○贍○家○口○其○兄○  
破○產○資○之○以○高○等○優○擢○諫○垣○漣○之○在○諫○垣○也○章○數○十○  
上○如○叅○經○略○熊○廷○弼○兵○部○尚○書○黃○嘉○善○皆○侃○侃○中○機○

要而功莫大於移宮節莫壯於劾奄萬曆寢疾久皇太子希得進見漣告首輔方從哲當直宿閣中每日率百官候安如宋文潞公故事不必見上亦不必令上知第令內侍知大臣在門足矣又傳語東宮伴讀王安皇長子當力請入侍遲明而入日暮而退以備非常及泰昌卽位甫十日不豫先是鄭貴妃新集女樂十人將進萬曆因病調攝而停至是卽以進賀帝體素羸一夕連御二生二旦次日得疾御藥房內侍崔文昇用大黃泄之遂洞下不止漣抗言藥悞請召

皇長子入侍且寢鄭貴妃封后命未幾傳錦衣宣漣并閣部大臣咸疑上怒且予杖閣臣咎漣言過戇漣不爲動執之愈堅旣入上目注漣者久之慰諭諸臣出辛未再召上顧皇長子曰科臣楊漣說渠宜常在朕左右極是又諭封李選侍爲皇貴妃者再甲戌上大漸復召諸臣及漣入受顧命顧命大臣事也漣以七品官得之益感激思報上崩諸臣將哭臨內侍守門持挺亂下漣厲聲叱之乃入先是受顧命時選侍披幃立呼皇長子入復趣之出啓上冊立爲后上不



應至是復擁遏皇嗣於內司禮監王安詒之出羣臣  
呼萬歲選侍召回皇嗣者三漣厲聲格之遂登文華  
殿羣臣禮見畢擁皇嗣歸慈慶而選侍猶踞乾清儼  
然以母道自居漣與冢宰周嘉謨御史左光斗連疏  
請移宮首輔方從哲議稍緩其期漣面折之復呼選  
侍內使責以厲辭聲淚併咽上顧內侍曰鬚子官真  
忠臣也於是宮乃移選侍亦卒不得封皇貴妃當是  
時漣以一身奪人主於婦寺之手外戒金吾內防宮  
掖坐宮門外五日夜不交睫頭鬚盡白非漣識力堅

定事且不可知雖不自以為功而忌其功者多矣宮  
既移言者分左右袒互訐不已漣復疏言臣於當日  
卽語諸大臣移宮自移宮隆禮自隆禮必兩者相濟  
而後二祖列宗之大寶始安先帝在天之靈始安卽  
本日緝獲盜寶罪璫只宜殲厥渠魁母滋蔓引大抵  
宸居未定先帝之付託為重平日之寵愛為輕宸居  
已定既盡臣子防危之忠卽當體皇上如天之度臣  
之議移宮者始終如此伏乞皇上於皇弟皇妹時勤  
召見於李選侍酌加恩數庶幾仰體先帝遺意疏上

報聞漣持論本平終爲羣小所側目適孫如游入閣  
漣出孫門忌者指漣爲之地於是屢疏求退乃予告  
御史高弘圖深惜其去特疏請召漣隨陞副憲魏忠  
賢與客氏譖殺王安漣家居時見宮府可駭事不勝  
憤惋輒推案起曰吾必誅此豎以報先帝其出也託  
少子於執友而御老母以行意如受顧命時得行其  
志不知羽翼已成豐筭見斗而莫能摧也旣而忠賢  
逐老成冒恩廕創內操用立柳稔毒愈肆漣疏列二  
十四大罪盡發其奸忠賢惶恐泣訴御前客氏與奄

黨王體乾曲爲彌縫溫旨慰賢且責漣尋端沽直然  
自漣首請上方而攻忠賢者疏且捆至矣會推冢宰  
漣以註籍不與矯旨責以規避褫職而恨漣刺骨必  
欲殺之第移宮名甚正難以坐罪復逮汪文言構熊  
廷弼大獄廷弼者漣垣中所推也能爲臺省排構漣  
疏直之謂議經略者終難抹煞其功憐經略者亦難  
掩飾其罪功在支撐辛苦得二載之倖安罪在積衰  
莫振悵萬全之無策熊得解任聽勘漣持論實平奄  
黨迎奄意誣漣與左魏等納賄故縱遣緹騎逮漣先

酷拷汪文言逼使引漣文言仰天笑曰安有貪賊楊  
大洪乎有甥見其受刑慘毒悲失聲文言叱曰孺子  
真不才死豈負我哉而效兒女子泣耶死不承漣至  
許顯純迎奄意酷刑坐賊漣惟呼太祖高皇帝不少  
屈卒斃於獄時年五十有四漣之死土囊壓身鐵釘  
貫耳慘毒萬狀暴屍六晝夜蛆蟲穿穴僅以血濺衣  
裹置棺中畢命之日白氣貫斗襯歸無葬地置於河  
側天下冤之諸君子在鎮撫司面黑如墨頭禿如僧  
用尺帛裹之衣服上膿血如染漣鬚髮俱白更爲可

憐○皆○坐○賊○而○死○發○撫○按○追○比○家○屬○漣○素○貧○家○旣○破○老  
母○妻○子○寄○居○譙○樓○上○親○戚○恐○禍○及○無○敢○留○者○追○賊○限  
急○瀕○死○忠○賢○殛○乃○免○當○就○逮○時○士○民○團○聚○洶○洶○道○府  
委○曲○開○諭○不○散○勢○且○激○變○漣○帶○刑○具○向○士○民○叩○頭○哀  
懇○乃○解○起○程○之○日○哭○送○者○數○萬○人○所○過○市○集○扳○檻○車  
看○忠○臣○炷○香○設○醮○祝○生○還○者○自○荆○達○豫○綿○亘○千○里○送  
至○黃○河○者○以○千○計○販○夫○菜○傭○亦○爭○以○數○錢○投○縣○令○匭  
中○代○爲○輸○贖○八○十○老○母○及○三○子○僅○出○城○永○訣○旗○尉○屏  
呵○不○許○隨○行○至○河○南○許○州○鄉○紳○郎○中○蘇○繼○歐○與○漣○爲

舊識送飯一席被偵探削奪蘇懼後禍自經崇禎改  
元乃膺卹典特贈太子少保左都御史諡忠烈廕其  
子之易爲郎已追在官贓銀三百兩給還贍母繼歐  
亦贈太常卿從優予祭葬漣與左光斗爲同年生同  
貳憲府同劾逆奄同以七月二十五日死故天下稱  
楊○左○如○漢○李○杜○云○

李遜之三朝野記曰羣小計陷六君子初擬移宮  
以止屬楊左與顧大章無預且苦於無贓封疆止  
周朝瑞薦熊廷弼顧大章同奄黨爭辨與楊左四  
人又無預於是合兩案爲一局而首倡封疆之說  
以定殺人之謀又獻串通王安之說俾殺之有名  
而諸君子一網盡矣

趙吉士曰公處危疑之際居政府者錯愕不敢發  
公獨毅然任嫌怨而不恤方諸呂端之鎖閣韓琦  
之撤簾何以異焉迨後身罹璫禍九死不回於諸  
楊尤烈矣

左忠毅公傳

附容城孝廉孫奇逢

阮大鍼始

皖城兩進士。並列臺省。一為左光斗。以抨擊逆奄而  
 死於正命。一為阮大鍼。以黨附逆奄。毒螫清流。且延  
 禍江左。而究死於非命。光斗號蒼嶼。生時月當大斗  
 故以命名。九歲能作粥賦。長老競奇之。由進士授中  
 書陟御史。風裁卓犖。視北直屯政。請倣漢力田科。以  
 屯入多寡為殿。最使人自為田。又請置屯學。設博士  
 弟子。因屯糧置餼。詔俱報可。屯功大舉。鄒元標道過  
 見之。嘆曰。往三十年。都人視藁秸。猶扶桑也。今畝棲

若此人苟有才天氣地力皆可得而變也萬曆不豫  
內璫劉朝矯東宮旨索世廟戚畹絕庄光斗還封不  
啓曰尺地皆殿下有今日御史受命巡田安敢私自  
進奉乎又糾巨璫陳登奪子粒爲屯蠹當按憲紀肅  
然一時稱真御史隨改督學獎才絕倖倣古弓箭社  
教士習射及山東白蓮教起奏功者半儒生泰昌升  
選李選侍猶踞乾清光斗抗疏言內庭之有乾清宮  
猶外庭之有皇極殿也惟皇上御天居之惟皇后配  
天得共居之其餘妃嬪雖以次進御遇有大故卽當

移置別殿非但避嫌疑亦以別尊卑也選侍李氏旣  
非嫡母又非生母儼然居乾清而殿下反居慈慶不  
得守几筵行大禮典制乖舛名分倒置將借撫養之  
名行專制之實恐武氏之禍復見於今臣誠有不忍  
言者矣楊漣旣已堅持復得光斗疏佐之乃移噦鸞  
上已正位言者葛藤不已光斗復言宮未移則皇居  
宜肅宮旣移則大體當存若內侍盜寶株連輩亦應  
槩從寬典如田叔燒梁獄詞者其守正持平如此泰  
昌賓天年號未定光斗曰今日以天啓存泰昌非以

泰昌更萬曆也。當以萬曆四十八年八月爲泰昌元年。議始定。當是時言路初開。光斗轉僉憲。楊漣爲副。憲魏大中爲吏科都羣賢。茹進而吏科阮大鍼性傾險。與光斗同郡。臭味素不投。又新以補缺。與大中忤。投身逆奄。刑科傅櫬亦結奄。甥傅應星爲兄弟。大鍼嗾櫬借汪文言劾光斗。并及大中。奄矯旨下文言獄。光斗疏辯發其冒認。兄弟事而楊疏上矣。疏內叩馬獻策語。隱指大鍼。因忠賢進香涿州。大鍼途中獻百官圖。或云卽媚逆以殺人也。楊疏光斗實贊之。復具

點將錄

專疏繼。其後逆奄與其黨恨甚大。鍼復簧鼓其間。必欲殺此三人。會推冢宰矯旨責以鉗制徇私。光斗與楊俱革職去。封疆獄起。緹騎至光斗父母年皆八十餘。一慟絕地。光斗大哭曰。兒不幸遺父母憂。但不敢蒙面屈膝。甘作奄豎。乾兒正恐百世不改爲父母羞也。行過白溝。與孫孝廉奇逢。月下相向。柝聲聒耳。緹騎左右環侍。光斗舉止自若。時客氏弟光先素不禮於士君子。語所善者曰。被逮諸老。囑我婉轉謀之。庶必有濟。孫以語光斗。光斗曰。我輩素具鬚眉。寧可向

婦人女子求活耶。下獄對簿。文言已前死。許顯純周  
燬其詞。坐光斗贓二萬兩。先是光斗爲北直屯院。曾  
以十三場籽粒爲定典。開永遠之利。鹿太公集鄉民  
告之。故皆雨泣。願計畝捐助。又爲學院。時廉而公所  
拔。皆知名士。通省諸生聞追贓急。各願代輸。甫兩日。  
卽得數百金。先賚入都。計且陸續運送。而光斗已斃  
於獄矣。時年五十有一。死後徵贓盡籍田廬。十不得  
一二。并及宗戚財。俱盡。家屬繫獄者纍纍。母周太夫  
人哭死。長兄光霽累死。兩弟光先光明幾死。倖免而

大。鉞。竟。高。陟。京。卿。奄。誅。大。鉞。遣。戍。諸。君。子。同。邀。卹。典。  
光。斗。贈。副。都。祭。葬。廕。子。弘。光。時。加。諡。忠。毅。弘。光。者。福。  
王。世。子。以。避。難。依。鳳。督。馬。士。英。煤。山。變。擁。至。金。陵。卽。  
位。士。英。素。與。大。鉞。厚。起。用。之。舉。朝。力。爭。不。得。竟。筦。樞。  
柄。士。英。雖。居。政。府。故。疎。鄙。一。切。線。索。皆。大。鉞。所。提。掇。  
大。鉞。日。夜。與。其。黨。謀。翻。逆。案。且。計。陷。光。斗。弟。御。史。光。  
先。濁。亂。朝。紀。左。良。玉。以。避。闖。南。下。聲。言。討。君。側。馬。阮。  
盡。抽。京。口。兵。遏。上。游。金。陵。遂。破。士。英。率。黔。兵。假。奉。太。  
后。南。遷。與。大。鉞。至。紹。興。僉。事。王。思。任。上。書。太。后。乞。斬。



士英以謝天下臺省劉明孝林時對交疏攻大鉞逐  
之士英窮無所歸依營帥方國安紹興又破謀挾監  
國投獻軍前監國先已脫走乃擁殘兵數千請入閩  
不許士英遜至天台山寺獲之與國安大鉞皆降繼  
獲閩中龍楨得三人連名請駕出關願為內應疏在  
已降後大鉞方遊山聞之自知不免投崖死仍戮其  
屍士英斬於建寧國安斬於杭州

林時對曰阮大鉞者薄有才技而蕩軼名教為鄉  
評所不齒寅入吏垣投身奄幕專與東林為難凡  
逮死諸君子皆與其謀人以巨魁自之奄敗罪列  
城旦每思乘間翻案賴威廟持之堅遂絕意仕進

流寓金陵廣買妓妾以歌舞自娛雅善填詞有春  
燈謎燕子箋諸劇傳播詞場馬士英者黔省世家  
子為宣府巡撫以罪罷職亦寓金陵相得甚歡大  
鉞間以女妓遺之士英益喜成莫逆陽羨再召大  
鉞迂之所請甚哀周言逆案難翻廢籍中誰為若  
知交可用者以士英對時編成籍忽起鳳督茫然  
莫解既知大鉞薦甚德之後擁立福藩晉揆席破  
格起用大鉞舉朝爭之馬估權求勝密請召對超  
擢江防兵部侍郎一時眾正相繼去國羣小連類  
以進任意掀翻世界重理三案至欲斲楊左之棺  
與同文之獄撤江防以禦左兵而宗社覆矣  
黃宗羲作陳貞慧墓誌略曰周鏞沈壽民讀書句  
曲貞慧與吳應箕讀書毫村皆好持清議裁量公  
卿當是時烏程執政八年以禁錮東林為事而宜  
興復相又思援手大鉞會壽民保舉入京劾楊武  
陵并及大鉞貞慧與應箕因草留都防亂揭顧杲  
為首一時勝流咸列姓名大鉞杜門咋舌欲死崇  
禎已卯金陵解試貞慧應箕舉國門廣業之社大

略揭中人也酒酣耳熱多咀嚼大鉞以為笑樂馬  
一英定策大鉞暴起遂廣揭中姓名造蝗蝻錄思  
余與杲從徐署丞疏逮問而貞慧亦為校尉縛至  
鎮撫事雖解已濱十死  
附記 阮大鉞之投崖戮屍編年所載也再考錢  
秉鐙所知錄則記馬士英方國安等斬於延平又  
與編年稍異及見宜里中萬言所編阮大鉞傳則  
載當錢塘分守時大鉞先通降表為內間者一年  
矣順治三年六月初  
大兵渡江士英國安等皆走大鉞獨迎降以內院  
從征方潯暑抵仙霞嶺面忽腫諸帥慮其不任鞍  
馬令少憩衢州大鉞詫曰我年雖六十餘騎生馬  
挽強弓有何病乎上嶺羣帥皆按轡徐行大鉞獨  
賈勇先登相去頗遠久之再歷五顯嶺見其馬嚙  
草路傍身橫危石上死矣羣帥駭嘆而去家僮下  
嶺求棺不得三日後乃以一門扉募土人往舁之  
已潰爛蛆蟲穿穴矣其僕云大鉞至嶺上即連呼

雷公饒我僕訝之大鉞指曰此非雷公耶語未畢  
墜萬仞崖碎骨而死蓋大鉞先以私怨致雷演祚  
於死人遂傳為冤報二說不同姑並存之  
趙吉士曰語云一薰一蕕十年尚猶有臭其左阮  
之謂乎忠毅殺身成仁而大鉞以七十之年徧地  
流毒卒乃投崖戮屍稍洩神人之憤論世者猶恨  
其晚矣

魏忠節公傳

附曹郎魏浣初

逆○奄○初○竊○朝○命○而○先○被○其○禍○者○爲○前○六○君○子○嘉○善○魏○忠○節○大○中○其○一○也○大○中○字○孔○時○號○廓○園○母○薛○夜○半○據○蓐○壁○棟○間○火○光○熒○熒○駭○爲○鬼○燒○緣○棟○上○升○至○屋○梁○之○正○中○而○大○中○生○家○酷○貧○父○訓○蒙○村○塾○挈○家○相○就○歲○輒○徙○不○恒○厥○居○四○歲○善○屬○對○八○歲○隨○父○塾○徧○授○諸○童○子○誦○稱○爲○小○先○生○十○六○歲○往○候○其○叔○病○叔○家○素○康○或○曰○若○叔○無○子○病○且○革○欲○嗣○若○矣○大○中○蹙○然○曰○幸○謝○叔○吾○父○止○予○一○子○若○嗣○叔○則○父○將○誰○嗣○堅○不○許○冠○童○子○入

洋無錫高攀龍過嘉善深器之大中遂執弟子禮已  
酉登賢書貧如故仍投徒賃屋三楹深不倍丈簷低  
僂而入東楹作竈勢欲傾一木斜支之家人出入日  
數十俯簾繩黑脆垂垂址又低窪晴霽亦濕閭閻細  
民所不堪大中處之恬如也丙辰成進士授行人冊  
封代世子鼎涓例有所贈不受同事者強之謝曰世  
子與鼎莎爭立費金錢多矣須令知朝廷上原有不  
愛金錢者再使岷藩擢工科給事中當是時天啓新  
卽位魏奄私客氏漸操大柄總憲缺部推鄒元標奄

意有所屬矯旨別推大中力持之又糾黜諸巡撫之  
不職者人謂大中每發必拔繫驢之糜其實身犯衆  
怒而不恤也繼轉禮垣時卹典濫甚大中引會典裁  
之吃不可動甲子吏科都缺阮大鍼爲奄義子已先  
得之而忌大中不已冢宰循資以大中名上刑科傳  
檄結奄甥傅應星爲兄弟大鍼喉檄劾汪文言而羅  
織及大中汪文言者內閣中書有口辯每往來公卿  
間時或刺探意旨招搖於外事亦未可知然無跡可  
指也文言先已廷杖褫職未幾憲副楊漣劾奄二十

四罪大中復抗章極論謂漣疏未發票而忠賢疏先  
下念其勤勞錄其小心矣又明日而漣疏下沒其忠  
愛罪其沽直矣惡狀代爲任咎逆跡代爲分割自疏  
自票盡出忠賢之意恐漣疏尚未經御覽也懷冲太  
子何以不育裕妃何以革封皇上南郊胡貴人何以  
暴亡有其事未有不傳之外者皇上身爲天子而三  
宮列嬪盡懸於忠賢客氏之手危如朝露能不寒心  
宜納憲臣之言立斬忠賢驅除客氏爲宗社久長計  
奄大怒賴閣臣葉向高力救或云韓爌得從輕罰俸先是

大中將請假值計典方舉河南道袁化中疏留大中  
新旨禁餽遺霍丘令家人以書帕投於途厥衛番役  
滿長安不得已發其事適晉撫缺奄黨欲得之而趙  
冢宰以謝應祥上謝舊令嘉善忌者以爲出大中意  
時閣臣魏廣微頒曆不至享太廟又後至大中同陪  
祀者糾之廣微慚憤其鄉人御史陳棊遂摘晉撫事  
攻大中降調與楊左同出國門去乙丑大獄起奄黨  
聚謀非熊督失陷封疆案不足盡死諸君子遂捏汪  
文言爲廷弼行賄許顯純酷煨文言言辯甚力至

死不承乃代砌獄詞急斃之以滅口然朝審日有旨待熊以不死而大中堅不畫題固欲以國法死熊者反誣以受賊良可痛也四月十一日緹騎至大雷電風吼水立士民慟哭送者數千人闔縣百姓爲大中設醮請命於上帝蓋以登籍後每事爲桑梓造福也六月十八日入詔獄受酷刑坐賊三千兩五日一比又切責顯純改三日六君子同被慘毒弛柙則梭弛錄則夾弛梭與夾仍帶錄柙受棍疊棍所中結爲黑丁黑丁漸陷爲深坎深坎上以膏藥裹焉再宿復加

拷掠藥裹搗去棍棍擊赤肉肉敗生蛆淋漓零落獄卒皆酸鼻顯純則揚揚如也七月十九日楊左與大中俱用全刑全刑者一夾敲五十槓子一梭穿梭五十或一百謂之一套楊大號而無回聲左聲呦呦如小兒大中則伏地受刑竟同木偶二十四日復用全刑大中初聞痛楚聲已而寂然顯純令管事二人入獄諭獄卒葉文仲將大中與楊左俱昇至後監顧大章問故獄卒云莫問今夜三位老爺要壁挺了獄中諱言死故云壁挺楊左以二十五日報故大中以二

十六日終不知死期與死法也。天暑發雷，領埋旨。故  
久不下三十日，始借楊左從牢穴中出，骸漲而黑，面  
與鼻平。坡坡有零落，憂并穢褥，捲之入棺。家屬不得  
憑而一哭也。奄誅次子學濂，刺血頌寃。六君子同邀  
卹典，大中特加諡忠節。長子學泚，祔葬御塋，配食專  
祠。贈誥云：相分公媪，當蔡京童貫之時，士亢君宗，開  
寶武陳蕃之禍，以爾臣忠章為子，孝位於箕尾，識歸  
天傳說之星，炳彼丹青，表入地，萇弘之血，翰林倪元  
璐筆也。六君子為副都楊漣、僉都左光斗、僕卿周朝

瑞御史袁化中副使顧大章暨大中而六皆同逮同  
死於獄者

盧宜曰：宜司鐸嘉善，得與公孫允柙交。柙字交讓，  
亦名下士，即周忠介以女字之者也。因見公被逮，  
北上時手書年譜，悉公生平，又讀錢相國士升序  
孝子集，載里人先夢公，今所御葬地，忠臣孝子坊  
額，金書煌煌，嗚呼！間氣所鍾，兆先見矣。  
附記：臣鑒錄曰：魏忠賢欲招仕籍，姓魏者為宗  
譜，諂之者多避居弟姪，行惟魏給事大中毀其帖  
以絕之，助教魏浣初亦不通名籍，遂除冷曹，宜謂  
忠節公固壁立千仞，若仲雪先生亦可云不辱其  
身以不辱其先者矣。

周忠毅公袁忠愍公合傳

奄難作。周忠毅朝瑞袁忠愍化中抗疏糾抨。咸受屠  
酷。皆前六君子也。朝瑞號衡臺臨清州人由進士授  
中書考選吏科值泰昌初卽位朝瑞入垣甫四日卽  
上慎初三要指畫多危懃上勿善也又請停止金花  
上益怒嚴旨降級調外天啓初復官轉禮科左夙與  
楊漣善移宮事力贊楊爲防微杜漸計御史賈繼春  
言先帝彌留之日親諭羣臣以選侍有幼女歎歔情  
事臣子當調劑得宜毋使失所其言非不近情第繼



春素反覆為清流所不與意亦騎牆觀望朝瑞遂劾  
賈喜樹旌旗妄生題目互訐不已為小人所側目又  
叅輔臣沈某不避嫌怨遼事孔亟朝瑞請姑用熊廷  
弼於山海謂邊塞之所恃者特一廷弼而兵部之早  
夜圖謀思中傷之者亦獨一廷弼故反間廷弼之語  
皆兵部之所喜變亂黑白以眩觀聽只要害一廷弼  
不顧遺悞封疆語甚切直刑部員外徐某指朝瑞為  
黨朝瑞特糾徐鵬鵠悞國謂臣之計用廷弼乃苦廷  
弼難廷弼想廷弼必不以為德而某詆臣為黨豈有

黨其人而置之危地者乎臣與廷弼從無一面實見  
邊塞不可不慎交代不可不嚴方恨言之不盡而某  
反謂臣言之多請留為後驗幸而不中則社稷之福  
也奄勢益橫不樂上御經筵傳旨暫停朝瑞具及時  
講學疏謂經筵日講暫免之旨如出自聖意閣臣宜  
引義力爭如阿奉中涓豈不聞人主當接見賢士大  
夫况皇上冲齡志氣未定種種借叢皆堪覆國獨有  
朝講不輟諸臣尚得瞻覲天顏庶幾展引裾之忠猶  
可白指鹿之詐今常朝已借題傳免倘併經筵日講

一槩報罷。恐將來司馬門之報格不以奏。呂大防之  
貶竟不及知。國家大事去矣。疏入。客魏恨甚。時甫竊  
魁柄。謂不立威。無以杜言路之口。朝瑞前既請用。廷  
弼督理山海。因與徐某忤。至是復脩隙。媚奄指受賄  
庇熊舉。封疆移宮二案。爲一網。清流之計。楊維垣復  
從。而和之。禍遂燎原。不可救矣。朝瑞已請假歸里。奄  
矯旨先逮。汪文言下鎮撫司。打問理刑許顯純。承奄  
意。拷掠文言。極刑不服。乃採用楊維垣賈繼春等誣  
叅語。自爲獄詞。與楊左五君子同逮。詔獄嚴訊。追賊

乙丑八月廿八日。與顧大章同飯。鎖頭郭元馳至云。  
堂上請帶鎖。杻將同出。有劉鎖頭拽顧袖云。且還房。  
不干爺事。內裏要周爺命。堂上者許顯純也。內裏者  
魏忠賢也。郭元押至大監。用帛帶勒死。

化中字熙。字武定人。由進士爲御史。不肯苟同時。好  
以資望掌河南道。會崔呈秀差回考察。穢聲狼籍。掌  
院高攀龍特疏糾之。削職去。化中實佐其啓事。呈秀  
銜之。又繼憲副楊漣特叅忠賢。謂忠賢之惡。憲臣既  
明。以入告矣。皇上卽念潛邸微勞。貸忠賢以不死。而

彼且日日懼死懼死之念愈深將免死之術愈工其  
狗黨狐羣失足於中者或憂禍之心轉迫將挺而走  
險或騎虎之勢難下且教猱以升其毒不僅在縉紳  
而在朝廷矣深宮大廷之內何可使多疑多懼之人  
日侍左右而不急爲之處分乎若不及今裁抑直至  
事敗求如神廟時馮保之下場亦不可得今或做王  
安例置之南海子或做盧受例置之鳳陽祖陵至傳  
應星等付法司問擬庶快朝野之心洩神人之忿疏  
入奄恨甚必欲殺之晉撫缺會推太常卿謝應祥御

史陳某迎奄意論應祥昏髦矯旨會勘吏部坐御史  
論人失實奄復矯旨以偏庇責部院而降吏科都魏  
大中等化中亦降級調外奄怒不解織入封疆案坐  
賊拷繫詔獄八月十九日子身在獄中關廟暗注大  
監夜半顯純令獄卒斃之次日報病故奄誅顯純殛  
乃邀卹典南京諡朝瑞忠毅化中忠愍

李遜之三朝野記曰楊維垣在羣小中最爲反覆  
逆焰燎原時爲之驅除正直伐異黨同不遺餘力  
及天啓崩崇禎卽位忠賢掌東廠如故維垣於十  
月十七日首具朝野望治方殷權臣欺擅久著疏  
叅崔呈秀阿媚廠臣且云祖制不許上言大臣德  
政何況內臣語侵忠賢又劾呈秀超遷吳淳夫受

丘志充金用腹心倪文煥躡陞弟凝秀為浙江總  
兵多所牽織思為脫網計又忠賢曾以十萬金創  
一佛刹延僧浴光為主庵既敗平時往來者俱絕  
跡矣光獨延之一飯維垣即疏叅之人盡為光危  
光挺身赴京維垣見之大驚曰即師耶疏已上奈  
何蓋前此曾求光薦引於庵光却之至是色沮恐  
其吐實光殊無此意也含笑而已弘光時維垣復  
希進用及金陵破乃狡置三棺云與二妾俱死將  
假此遁去亦竟為仇家所殺  
盧宜曰媚奄而首與諸君子為難者楊維垣賈繼  
春也乃後之首攻崔呈秀以為倖免計者即此二  
人思陵與輔臣語及賈繼春日惟其反覆所以為  
小人一語如見肺肝矣

顧裕愍公傳

經撫之獄起刑部郎顧裕愍入章秉獻持公遂罹奄  
禍云大章號塵客常熟人父雲程太常卿大章少負  
異才與弟大韶孳生有二陸兩蘇之目成進士教授  
常州郡庠熊廷弼為督學御史持體嚴肅稍不常意  
叱咤風生甚者或予杖大章執會典爭之至聲色俱  
厲監司郡縣俱在代為悚惕大章屹然不動廷弼亦  
無以難大章反加禮焉御史某貪而恣按臨常州謁  
聖後例當講書大章執卷而前曰諸生止知訓詁不

足入聽教官願爲代講遂講鄙夫可與事君章聞發  
曲盡舉座動色御史懾伏不能出氣陽羨方隸弟子  
員大章一見深器其文念其寒周之甚篤陽羨旣貴  
見大章頗有驕色遂絕之不與通入爲國子博士遷  
儀曹郎與宗伯忤出爲泉州府推官移疾歸起歷刑  
曹明習法比手批口決迎刃輒解天啓初政府召福  
清未至南昌居首揆有間劉於葉者葉頗介介及劉  
以言去國恩禮未周大章力言劉無他意得票擬從  
優遼瀋之陷也獲內間二百餘飢寒瘕死莫敢問尚

存五十人公曰以一身易五十人命且甘之况一官  
乎即日研訊論一人頌繫二人餘皆縱遣以久次調  
禮部會有經撫之獄王司寇紀素才大章謂主讞非  
大章不可留之在部楊鎬王化貞皆輦重賄投津要  
希冀末減熊竟無所營求朝議咸欲辟熊而輕楊王  
大章謂誅心則廷弼難輕宥論事則化貞實罪魁不  
當同科應山諸公皆持此論奄黨大愠楊維垣遂出  
疏叅大章受熊賄四萬代爲營脫大章疏辯謂行賄  
應行於議釋之人不應行於定辟之人力持之兵部

尚書張鶴鳴行邊奏某內間事謂某遣家人交通降將詞連其族事甚具王尚書問諸司皆唯唯大章獨曰內間大事也主僕至親也豈有主遣其僕而姓名俱不知者况某已刑訊十餘次姓名終不能供甚不可解謂之信獄可乎王大笑蓋其實係無辜爲番役所誣也審畢王問降將之族當坐何罪諸司不能對大章曰據律應流後王奉譴侍郎楊東明署部事欲定讞以降將族當論斬大章直前曰降將之族不同謀不同居者止期親論斬楊作色曰謀叛誅及三族

何論期親大章曰章所執乃大明律老先生所述乃漢律也讞乃定後熊王案大章卒定同辟已爲袒王者所側目而王尚書前率同官伏闕請誅奄其疏出大章手奄銜之甚遂入封疆案以鬻獄坐大章與楊左諸君子同下詔獄五人先後拷死大章亦以追賊脩受極刑慘毒異常許顯純煅煉成獄乃移刑部定招語大章曰爾十日後還到此比較毋得妄言我之是非卽言我亦不懼大章至部九月十三日在城隍廟會審慷慨對簿曰章奉旨定罪若辯是抗旨也若

不辯則欺本心欺天下後世且五人者皆前死矣借  
章以實五人之招章既自誣服又代五人者誣服何  
以見五人於地下乎諸公能昭雪此案則萬代瞻仰  
不能○有○鎮○撫○原○招○在○夫○復○何○言○法○司○不○能○詰○依○舊○問  
斬復責十五板還獄歎曰吾不可再辱矣呼酒與弟  
大夏從弟大武訣飲藥未絕雉經而卒天啓乙丑九  
月十四日也時年五十奄誅邀卹典南京諡裕愍  
盧宜曰公入詔獄時獄中有黃芝生焉一莖六瓣  
燦然有光芝瑞物也而生於狴狴間失其地矣君  
子道消神告之矣

### 吳氏雙忠合傳

附御史夏之令後軍經歷張汶

逆奄魏忠賢矯詔杖殺吳御史裕中於午門又下誥  
勅房吳中書懷賢於鎮撫司拷掠死裕中字某江夏  
人由進士歷官御史素負強項聲時忠賢新用事閣  
部臺省多奔走其門次輔貴池亦入奄幕方進遼東  
傳於經筵殺熊廷弼蓋迎奄意以熊不肯附逆故又  
楊忠烈二十四罪之疏上盡發奄惡接踵彈射者章  
滿公車熊與楊皆楚人也忠賢遂與楚人仇不解吳  
御史又熊之姻家忠賢尤耿耿視貴池偶失奄意裕

中叅疏適入惶駭失魄求救於崔呈秀呈秀督三殿  
大工奄至工所呈秀邀奄到中極殿西隅密語移時  
奄領之去次日奉嚴旨於午門外着實杖裕中一百  
棍爲民杖畢昇至寓死矣楚人皆以目語無敢頌其  
冤者懷賢字齊仲休寧人故與裕中有宗誼見其死  
慘甚心竊痛之每入直覩奄逆狀輒憤悶不平及見  
楊漣疏註其旁曰當如任守忠例卽時安置適其族  
工郎吳昌期以忤奄罷官懷賢遺書稱之有事極必  
反反正不遠語頗流聞逆奄耳目徧長安纖悉咸報

名曰打事件嘗有四人飲於酒樓一人者痛哭罵忠  
賢三人者止之一人者更戟手罵曰忠賢雖惡豈能  
剝吾皮耶偵事者尾其寓夜半忽一羣獍漢排闥縛  
四人者去奄曰汝謂我不能剝汝皮耶姑試之命塗  
以瀝青自頂達踵用小鐵椎遍敲其身皮盡脫其人  
展轉叫號立致之死三人者皆驚仆良久乃甦各賜  
壓驚銀一大錠而出其殘酷如此奄甥傅應星聞懷  
賢語遽以告奄大怒徑遣校尉至寓綁縛懷賢及子  
道升妾丘氏送東廠懷賢茫然莫解比對簿串入東



林案內坐以謗訕朝政爲楊左餘黨懷賢曰使某得與楊左齊名亦復何恨撈掠備慘毒終不屈竟死詔獄同時有御史夏之令光山人進士天啓初巡視中城疏劾內草廠與羣奄閔事已解至是復窮治之下鎮撫司打問追賊後府經歷張汶亦疏叅忠賢咸被拷死奄誅俱邀贈卹

盧宜曰吳御史身爲進士又係楚人與江夏應山同遊地下可以不恨若吳中翰者雖於明哲之義未孚然視受國恩登兩榜而甘爲義子乾兒者相去又何如哉

萬忠貞公丁學士公夏太常公劉太僕公合傳

黃文忠道周於西湖作兩朝忠烈祠碑記。載天啓中蒙奄難者前後六七君子外。又得萬忠貞璟丁學士乾學夏太常嘉遇劉太僕鐸云。璟號元白。新建人。由進士授刑曹。調工部。專司鼓鑄銅斤。匱乏爐座。所出無幾。聞內官監貯有廢銅數百萬。移文該監。忠賢怒。不報。謂外官何得稽查內庫。復疏請忠賢矯旨格之。終不發。泰昌慶陵爲期甚迫。殿門銅樞紐冶鑄最艱。諸璫皆規避。璟奉命督其事。甫一月而功成。偶過西

山見忠賢所自營生壙僭侈上擬至尊拊膺長歎疏  
發其奸并及廢銅事累五千言字挾雷霆而句嚴斧  
鉞謂忠賢性狡而貪膽粗而獍廕子姪則一世再世  
賞奴隸則千金萬金立枷士民斃至數十命驅逐大  
臣處置言官多至十數署近見忠賢所葬墳穴翁仲  
簪朝冠而環列羊虎接駝馬以森羅制作規模埒於  
陵寢前列祠宇又建佛堂竭東南之物力冠西北之  
旃檀曾不聞痛念先帝之陵寢未完曾不聞蒿目先  
帝陵寢工費之無措於臣所請廢銅一事僅一引手

之勞可立救燃眉之急而把握利權罔知顧忌纖悉  
不以假人盡內廷外廷之人止知有忠賢不復知有  
皇上浸假而狐假虎威螾噴龍毒王振劉瑾之禍尚  
忍言哉疏入忠賢大怒當是時副憲僉憲皆專疏糾  
抨臺省彈文幾滿納言之署奄以楊左諸公人望所  
繫不敢遽施侮虐姑先借曹郎以立威嚴旨廷杖一  
百奄令羣豎從私邸拉至午門陰囑金吾尉必致之  
死王體乾田爾耕喝令重打屢換打手尚嫌其輕杖  
畢倒拖而出又伏小璫於外槌擊錐刺遍體流血且

腫色如墨人咸不忍見聞踰四日死崇禎贈太常少  
卿予卹典且特諭曰萬璟冤死堪憐解到誣坐贓銀  
三百兩給還家屬以旌忠直南京追諡忠貞

乾學字天行號自庵山陰人附籍宛平成進士爲檢  
討甲子典試江西奄焯方張欲抨之念詞臣無言責  
而中外擊奄者多不勝憤激於中以試錄代彈文於  
第三程策內言中旨頻頒緹騎四出今且通國爭之  
而不勝天下事變寧可預料漢用曹節王甫而張角  
之兵起唐用仇士良劉季述而黃巢之亂興本朝汪

直劉瑾之禍釀之有端去之有術其不可用罔明甚  
東陽之委蛇旣未可爲劉謝之潔已亦豈得策而韓  
文之聲大義未可盡非乎顧何以如楊一清卒清君  
側之奸乎奄聞之怒甚矯旨與各省考官方逢年顧  
錫疇等於試題含規諷者皆削職忠賢猶銜恨不置  
而家在長安奸黨高守謙藉金吾勢恐喝索賂乾學  
叱曰我以忠直得罪死生惟上命肯以賄免耶諸奸  
揣忠賢怒未解忽擁數十人口稱緹騎掩捕悉掠家  
資去已乃知其僞憤鬱而卒奄誅子聖肇頌冤下法

司嚴訊置守謙於法卹贈如例或云忠賢命守謙詐傳駕帖立時勒死聖肇妻山陰王思任女玉映爲詩紀其事

嘉遇字正甫華亭人由進士初授保定府推官以廉直稱行取授禮部主事素與鄒之麟善之麟後以忤元趙去其黨諷嘉遇一至其門卽擢臺省不爲動遂尼之不得與考選又屢疏攻首輔方某并及元趙言元某謂臣震撼正人正人今日豈無然元某決非正人也未有正人而但識私恩不以格君樹人之道規

其師而以媚主蔽賢之術導其師以致天怒人怨喪師蹙國正人之得名若是其捷正人之收功若是其舛亦無貴於正人矣時元趙爲首輔門人主持東黨其勢甚橫嘉遇疏凡六上首輔不安其位去而元趙亦因此不振未幾改南銓高邑爲冢宰調北部以員外署選事亦服其秉正不阿也而奄黨忌之益甚借會推晉撫事與羣賢並去乙丑五月與六君子逮赴詔獄許顯純酷刑坐賊擬以城旦旋鬱鬱發病卒嘉遇自歸田後家酷貧賃一園以寄跡卒之日篋無殮

衣榻止殘編咸惜未竟其用孫相國承宗有詩哭之  
曰未刷鳳凰羽翻成鷹隼猜其爲名賢所重如此崇  
禎改元贈太常卿

鐸號洞初廬陵人始祖剪官大行忤時宰遣使絕域  
不屈遇害再傳文懿公宣忠愍公球皆以文章節義  
顯鐸生而鳳目頰顏聰穎絕倫間好書法繪事有神  
童之目由進士初授西曹煮粥置藁以恤囚全活甚  
衆賫帑金使陝西道遇劫鐸單騎直前賊遙望驚爲  
關壯繆護持悉遁去蓋懾其儀表也俸滿出守揚州

心傷朝政賦詩有揚城君恩重陰霾國事非之句書  
僧本福扇頭爲邏者所得邑紳倪文煥奄之義子也  
居鄉恣侈憚鐸掣其肘喉奄矯旨逮問鐸坦然不改  
常度揚人以縑素乞書者應之不倦士民數百人悲  
號叩閭刑部侍郎沈演謂聖朝不以語言文字殺人  
豈可以將毋同之字跡成莫須有之公案讞上得釋  
在京候補先是鐸下獄時與勳戚李承恩御史方震  
孺善承恩者以擅用龍袍擬斬而震孺則以按遼擬  
戍者也承恩當熱審期意莫申寃曾謀之鐸會鐸事

白得釋將仍赴揚州任途遇承恩之子復申前請鐸  
託同年溫國奇轉懇尚書徐兆魁事覺為厥疏所糾  
罷兆魁國奇復逮鐸并僕劉富鐸在獄以青詞自禱  
理刑張體乾知奄恨鐸遂誣與假官曾雲龍同謀倩  
道士方景陽咒咀厥臣酷煨景陽誣服景陽實不識  
鐸兩造亦未嘗面質皆空中羅織也景陽已斃獄底  
刑部尚書薛某承順奄意竟擬鐸立斬景陽戮屍劉  
富曾雲龍擬絞庭審時鐸再三折辯薛曰當此時只  
管自己功名那管别人性命鐸曰一時富貴有限千

秋清議難逃薛大恨之獄決張體乾谷應選皆以緝  
捕功受陞賞奄誅獲昭雪贈太僕卿定逆案薛某以  
殺鐸媚逆辟抵并辟張體乾

趙吉士曰湖山蒼蒼湖水悠悠兩間浩氣何春何  
秋腐尹操割正直是讐卓哉諸公碧化丹留  
盧宜日觀灼中志所載李允貞籍沒家產進過八  
萬兩追交六萬兩又行賄王體乾王永祚王文政  
三奄不敢收進之御前共十五萬兩其各項花費  
掌家侵吞屋下隱埋逃僕誑拐入獄被騙者不與  
焉一奄如此則忠賢之首惡不知尚多幾倍而羣  
奄分婪者又不知幾何帑藏安得而不空民生又  
安得而不匱耶深居九重而視天夢夢良可歎也  
附記張烈士者失其名字九也江寧諸生年將  
三十力學好奇丁卯夏璫禍熾競傳僭革矣烈士  
自愧不能作徐翟又耻事羿莽狂吟江畔脫衣冠

入水死吳興茅元儀紀其事復爲詩弔之曰祖宗  
累葉士風淳死國於君別樣新以爾白衣酬主意  
補鍋未必受恩人

### 兩廣總督何公傳

語云求忠臣者必於孝子之門。於何總督士晉益信。  
士晉號武莪宜興人宋丞相執中之裔父爲族讐培  
擊幾斃復陷之於獄甫輸贖而死士晉年九歲讐且  
甘心殺之。與杜後患繼母吳保抱維持備歷苦辛士  
晉亦善體母意深自晦匿歲飢母躬親耕織爲鄰家  
傭女紅每夜子母共篝一燈母織子讀漏必三四下  
無間寒暑終不敢出一呬。唔聲懼爲讐所覺也。弱冠  
登萬曆甲午賢書母隨病臨訣始出所藏血衣授士

晉當是時讐勢方張懼其跳軀倖脫復飲泣三載專  
意揣摩戊戌成進士卽乞假歸鳴冤當道卒置讐於  
理稱何孝子初李寧波能治劇再調杭郡超拜給事  
中萬曆在御久倦於勤鄭貴妃寵專夕日夜媒孽皇  
長子異立其子後封福王者幸外庭持之堅方猶豫  
未○決○而○張○差○挺○擊○之○變○起○提○牢○主○事○王○之○案○鈞○得○其  
隱謂內侍龐保劉成使之而詞連戚畹鄭國泰并及  
貴妃獄未竟越宿而張差中毒啞不能言人言益洶  
洶廷臣亦有袒貴妃者亦有緘默持兩端者士晉獨

頌言攻之連上安國本消宮釁四疏謂皇太子自冊  
立以來告之天地祖宗則天地祖宗式憑之矣告之  
百官兆庶則百官兆庶翼戴之矣告之九彝八蠻則  
九彝八蠻拱向之矣當此之時雖內有衽席之私恩  
外有戚畹之仗助叅以公孫侂之謀挾以中常侍之  
黨日令荆軻聶政與東宮爲難天下人心其誰與之  
祇足取赤族誅而爲萬世笑耳故東宮安則各官安  
諸○藩○安○海○內○俱○安○東○宮○危○則○各○官○危○諸○藩○危○海○內○俱  
危○今○當○東○宮○震○驚○之○後○人○心○覬○望○之○時○亟○宜○下○法○司



明正其罪以謝九廟之靈并諭東宮慎起居嚴侍衛  
凡與椒房之列者俱令分任其責又請令鄭國泰自  
具一疏嗣後凡皇長子皇長孫一切起居俱令國泰  
保護稍有疎虞即便坐罪庶人心帖服永無他慮讀  
其疏者寒毛起粟謂禍且不測幸帝諒其忠疏又切  
直明快心亦動乃御慈寧宮召輔臣卿寺臺諫諭以  
保愛東宮至意令速決張差并斃龐保劉成於內遂  
以風顛竟其獄士晉已點江西主考忌者乃倡元功  
奇貨之說借中旨外轉督浙江驛傳而皇長子竟不

廢得立爲皇太子一時直聲震天下屢進巡撫廣西  
粵人德之立生祠與王新建並祀再進總督兩廣逆  
奄竊魁柄士晉爲正人領袖心猶忌之前主風顛者  
俱起列要地且以黨護王之案合謀傾士晉羅織封  
疆案內擬與楊左諸君子同逮矣特以士晉握重兵  
於邊方懼與晉陽之甲不敢遽遣緹騎而左光斗從  
獄中刺血作書縛於家僕股走粵東報士晉蓋光斗  
與士晉交最篤自知必死馳書訣別也士晉得書悲  
憤欲絕誓與俱死將奏請掛冠歸獄於京師而奄黨

御史梁夢環叅士晉門戶巨魁日謀翻局奄卽矯旨  
削奪得報疾馳至金陵聞楊左諸君子已同斃詔獄  
知時事不可爲遂仰藥而卒猶列名三朝要典之首  
坐賊嚴追逮長子繫獄崇禎登極知其冤悉蠲所坐  
賊仍復官加贈兵部尚書祭葬廕子恩典甚渥士晉  
盡節時其所報讐家猶耿耿視士晉懼罹籍沒讐且  
乘間覆巢不敢盡室歸里治命長君扶柩回宜興而  
潛遣側室攜所育仲季兩孤託於嘉善之周宗文錢  
士晉皆浙闈分較時所得士也兩人已成進士登仕

版聞變毅然以嬰白自許急操小舟往迎如母而送  
奉之於家兩人又密籌曰吾師留丹將碧而闕孽未  
剗兩世兄年漸長矣不及時授室勉之成立吾輩一  
旦隨朝露恐吾師之祀淪於若敖也何以見吾師於  
地下因各以其女女兩孤當是時兩人者已稱丈人  
行矣然不敢以姻婭故失師生之禮也每月朔望如  
母在錢則宗文必具冠帶登堂肅揖問起居而退若  
在周士晉亦如之終其身未之或間也兩人之古道  
如此

盧宜曰宜司鐸嘉善庠生何華元卽武莪公之孫  
周太僕之甥孫也爲宜言其始末甚悉惟公之卒  
也華元獨云仰藥他書旣皆不載而公之家傳亦  
僅云遂卒於難想當時諱言之華元諒不誣其祖  
也并記之

巡撫方公傳

明天啓中諸君子死奄禍者前後趾相錯御史方震  
孺與給事惠世揚皆奄所必欲死之者適有天幸卒  
不○死○相○繼○出○獄○門○而○震○孺○尤○稱○元○佑○完○人○震○孺○字○孩  
未原籍桐城後移壽州母孔孺人懷娠時夢正學先  
生至其家因命今名幼穎異舉體肌肉皆香萬曆癸  
丑成進士初授福建沙縣令兩舉卓異入爲侍御史  
震孺夙以經濟自許尤長於奏議愷摯似陸宣公明  
快似蘇端明每一疏出長安爭傳誦之首請開門戶

之禁劾閱科。譁張險幻。貽悞封疆。言挺擊一案。使張差而果癩人也。何以不癩於他所。而手持棗棍。敢深入元子之宮。先帝之危。且在五步之內。雖骨月間。原不可無調停之法。但不當因調停而遂謂論奸者盡小人。使挺擊之奸。他爲烏有也。東林中原。多依草附木之徒。但不當因不肖。以及賢而遂爲竭澤之漁。瓜蔓之抄舉。趙南星高攀龍劉宗周諸賢。羅而錮之也。又言使乾清而久居選侍。則至尊當避居於何地。使貴妃而久處慈寧。則孝端必怨恫於無棲。且傳宮闈

之線索。豈盡虛空。兼以佳冶之薰蒸。慘於挺刃。近以中旨之傳宣。恐蹈斜封之隱禍。疏上名大起。然奄黨之銜恨者深矣。遼左孔亟。自請犒師。言臣本柔脆。書生當此炎炎烈日之中。猶有熱血黃砂之想。凡以激忠臣義士。專心東向耳。天啓元年六月。命費金幣出關賞卹將士。疏言河六不足恃。遼十有可乘。我以河爲界。則士氣先頹。以撫順爲界。則人心自奮。榆關一路。豈能卽鎖薊門。若靠三岔。作家則人且聞鼓聲。而遁矣。是時三岔以西。四百里無人烟。衆裹足莫前。震

孺獨慨然就道當宁聞其丰采遂命巡按遼東且監紀軍事比受命日陳師對壘居不廬食不火甦羸無人狀而意氣益勵相持七月感憤時事疏言廣寧情形毋論戰不成戰併亦守不成守又言山海無外衛宜駐兵中前以爲山海眼目今經撫心同手異疆事必致大壞後皆一一不爽壬戌正月差滿候代回前屯造冊

大兵夜渡三岔河巡撫王化貞棄廣寧走大帥擁殘兵駐覺華島尚存米豆二十餘萬人民數萬震孺痛

哭曰天下安危在此一着若媾島兵以攻榆關豈有幸哉率都司張國卿親自航海責以大義挾之而歸自杜松劉鋹三路敗衄後大帥擁重兵者風鶴入耳卽振策先奔廣寧陷沒堅城劇屯竹破草偃經撫不敢駐寧前鼠竄入關獨震孺以一書生往來蛟宮鯨窟中人皆爲之寒心而奄黨反操白簡隨其後矣時經撫互訐震孺右經而絀撫遂與奄忤奄黨劾其攘差下部院議總憲鄒元標奮筆曰方御史保全山海無過且有社稷功而科臣郭某遂借道學以攻總憲

鄒去震孺亦乞歸乙丑郭再劾震孺河西賊私黨庇  
熊廷弼失陷封疆矯旨逮問緹騎至所居不戒於火  
長安傳其死矣震孺慨然卽訊坐贓六千四百兩日  
一杖比弟震仲震鼎拮据誣金甫竣而揚州守劉鐸  
之獄起株引及震孺并擬辟至秋決時次早當赴市  
曹夜半忽傳皇長子生得免奄猶日遣人伺其動靜  
震孺處之怡然踞一土坑日讀書賦詩獄卒某時佐  
飲啜疑而詢之曰此我妻某氏聞公忠臣手治以獻  
者也因賦羅刹成佛詩以紀之丁卯八月作易序年

譜以待駕帖會天啓崩得釋科道交薦而政府有索  
賄者笑曰使方子而肯行賄魏璫時九列矣拂衣竟  
歸癸酉甲戌間流寇攻壽州父老子弟環向而泣遂  
毅然獨任城守事萬衆肉薄攻城震孺冒矢石殪巨  
魁賊乃駭遁撫軍史可法上其功僅補廣西叅議有  
叛將踞廉州總督沈猶龍檄震孺單騎往撫叛者愕  
然曰此巡按遼東方御史也遂降晉巡撫廣西蓋崇  
禎特簡云旣而燕京陷南都立無意復仇震孺痛哭  
拜疏馬阮尼之病遽不起易簣時索筆題詩有麻衣

如雪見先生之句蓋志實未伸云長子至樸仲子維馨維馨仕閩署瑞金篆上封事曰蕭王為將而不為天子此光武所以中興也宋高為天子而不為將此紹興所以終南渡也時以為名言

大兵南下走南雄乙酉嘔血而卒子居易髮方覆額亦死之

趙吉士曰惠當刑部堂審時徐御史問曰汝常謂崔少老為小人今果是小人否惠曰君等見地高明或以為君子世揚愚昧到底只認是小人聞者大噓嗚呼使惠於是時而五日不汗不且與方侍御同壽千載哉惜乎屈膝逆闖遂與武愆鞏焞等同類而為人所唾也不亦悲夫

盧宜曰奄黨以攘差誣公復誣公受賄庇熊又誣公望風先逃賄逃二案固不辯自明即以攘差論巡按之差人所攘也若遼東巡按之差不獨人所不敢攘方且百計求脫避之惟恐不速而公獨以此坐罪當事之黑白混淆尚可言耶

魏孝子傳

附鹿太公正

鄰人金啓先

魏孝子者魏大中之長子也。大中以奄死，孝子以痛  
父不食死。崇禎卹死禍，諸臣建坊旌表於魏，獨有忠  
臣孝子之褒。尤焜燿一世云。孝子名學淨，字子敬，幼  
穎異，有至性，書過目輒成誦。年十六，補博學弟子，兼  
善詩古文，名甚噪。九歲時，赴外塾，爲負布花者，擠墜  
橋下，右股折，母錢氏病疽，方劇，告父曰：「當一意醫，母  
勿醫。」我旣接骨，仰臥者數十日，睡中有呻吟聲，醒則  
愉愉如無病者。日看陶詩自娛，安父母心也。大中旣



貴廉於官仍授徒養母甲子大中長吏垣益以激揚  
爲已任時衆正盈廷天下想望太平學泚喟然歎曰  
無根之花其能久乎自里中奉書以閒居樂志爲諷  
大中得書歎曰豈不懷歸勢不能獨潔耳聞者咸服  
學泚之知幾不待璫焰之烈也及就逮學泚躡踊欲  
從大中呵曰我死分耳父子俱碎毋爲也學泚陽遵  
父命陰先檻車而馳告急於定興鹿太公太公者進  
士鹿善繼之父名正與容城孫孝廉竒逢於大中有  
舊好且皆慷慨尚義以俠聞善繼方佐督師孫承宗

幕太公命孫化麟孫使弟竒彥走關門上書閣部閣  
部因巡視薊門請入覲冀於陛見時求貸諸君子逆  
黨懼閣部提兵清君側忠賢遶御榻而號夜半嚴旨  
阻之追贓益急太公與孝廉家素貧百計捐募學泚  
必欲入京伺動靜乃變姓名爲金子陶孫仲弟竒遇  
偕之入京師邏者如織暫留良鄉觀變使其僕過錦  
衣王涖民王曰令汝小主人自來是誠在我他任良  
鄉某處我盡知之但戒緝事諸役使勿洩耳學泚潛  
過王得料理橐餽先是大中被逮其鄰劉啓先灑泣

請爲家僕以從。凡追比輸金，皆劉擎以入學。伊欲代其役，一見父劉微，以告大中，急揮之以事，露必無生理也。七月二十四日，劉入錦衣輪，金大中不復能坐。起桎梏，仆堂下。劉膝行而前，見額帕垂覆面，整之背，半露掩之。蠅嚙腐膚，驅之氣，半不續。微曰：捉我兒逸去。劉不覺失聲哭。隸卒呵之出學。伊聞之痛絕而甦。大中竟益死獄中。學伊扶視歸途，中晝夜哭不絕聲。聞者無不泣下，爭欲識之。轉相告曰：此浙江嘉善魏公子真孝子也。抵家，家人進食，拊膺慟曰：我父獄中，誰爲進之食者？竟不食死。崇禎登極，特蒙優卹，附祠建坊以旌之。

趙吉士曰：明運百六柄授奄腐謁者，有兒鬚眉無父而忠孝，獨萃於一門烈矣。若鹿氏一堂三世孫氏兄弟三人，誠燕趙之士哉。至於捐金赴義而顯純宗族，亦多與焉。人心固不死也。

忠

